

## 每週經課朗誦經文(巴克禮漢羅/教羅)2014/03/30

### 共同經課 - 1

#### 撒母耳記上十六章一節~十三節

1 耶和華 kā 撒母耳講，我已經棄 sak 掃羅，無 hō伊做以色列王，你為 tiòh 伊憂悶 beh 到 joā 久 ah？你 tiòh 用角貯油滿滿；去 ah，我 beh 差你去伯利恆人耶西 hia；因為我 tī 伊 ê kiáⁿ ê 中間備辦一個王。2 撒母耳講，我怎樣 thang 去？掃羅若聽見，伊 beh thài 我。耶和華講，你 thang 帶一隻牛 á kap 你去，就講，我來是 beh 祭獻耶和華。3 你 tiòh 請耶西來赴 chit-ê 祭祀；我 beh 指示你所應該行 ê 事；我所指示你 ê 人，你 tiòh 替我 kā 伊抹油。4 撒母耳就照耶和華 ê 話去行，到伯利恆；城裡 hiah-ê 長老 lóng ngiáuh-ngiáuh-chhoah，出來迎接伊講，你來是為 tiòh 平安 mah？5 伊講，為 tiòh 平安；我是 beh 祭獻耶和華；lín tiòh 清氣家己，來 kap 我赴祭祀。撒母耳就 hō耶西 kap 伊 hiah-ê kiáⁿ 清氣，叫 in 來赴祭祀。6 In 已經來，撒母耳看見 í-lī-ap，意思講，耶和華所 beh 抹油 ê，果然 tī 伊 ê 面前。7 總是耶和華 kā 撒母耳講，莫得看伊 ê 容貌，kap 伊身軀 ê 大漢；chit 人是我所拒絕；因為耶和華 teh 看無親像人 teh 看；人看外貌，耶和華是看心內。8 耶西叫 A-pí-ná-tát，hō伊 tùi 撒母耳 ê 面前經過；撒母耳講，耶和華也無揀 chit 人。9 耶西 koh 叫 Sa-má 經過；伊講，耶和華也無揀 chit-ê。10 耶西 hō伊 hiah-ê kiáⁿ 七個，lóng tùi 撒母耳 ê 面前經過。撒母耳 kā 耶西講，耶和華也無揀 chiah-ê。11 撒母耳 kā 耶西講，你 ê kiáⁿ lóng tī-chia mah？伊應講，Iáu 有一個 soah 尾 ê，taⁿ teh 飼羊。撒母耳 kā 耶西講，你差人 chhoā 伊來，因為伊 iáu 未來，咱無 beh 坐桌。12 就差人 chhoā 伊來；伊是赤色，目矚清秀，生做好看。耶和華講，chit 人就是，你起來 kā 伊抹油。13 撒母耳就用角內 ê 油，tī 伊 hiah-ê 兄 ê 中間抹伊；tùi hit 日起，耶和華 ê 神大大臨到大衛。撒母耳起身 tò 去 Láh-má。

### 共同經課 - 2

#### 詩篇二十三篇

1 大衛 ê 詩。1) 耶和華是我 ê 牧者，我無欠缺。2 伊 hō我倒 tī 青翠 ê 草埔；Chhoā 我 tī 安靜 ê 水邊。3 伊 hō我 ê 靈魂精英；為 tiòh 伊 ê 名，chhoā 我行義 ê 路。4 我雖然行過死蔭 ê 山谷，亦 m̄驚災害；因為你 kap 我 tī-teh；你 ê thui，你 ê 柺，安慰我。5 Tī 我對敵 ê 面前，你 kā 我排設筵席；你用油抹我 ê 頭殼；我 ê 杯滿出來。6 恩典 kap 慈悲的確 tè 我到一世人；我 beh 永遠 khiā 起 tī 耶和華 ê 厝。

### 共同經課 - 3

#### 以弗所書五章八節~十四節

8 因為 lín 前是暗，但是 taⁿ tiàm-tī 主是光，tiòh 照光明 ê 人來行，9(因為光 ê 結子在 tī 一切 ê 好 kap 義 kap 真)，10 驗明甚麼是主所歡喜 ê。11 莫得 chham-chhap tī 烏暗無效果 ê 行做，khah 好 tiòh 責備 in；12 因為 in tī 暗靜所行 ê，連講都見笑。13 獨獨凡事受責備 ê 就是 hō光所顯明；因為見若受顯明 ê lóng 是光。14 所以講，睏 ê 人 tiòh 醒，tùi 死人中起來，就基督 ê 光 beh 照你。

### 共同經課 - 4

#### 約翰福音九章一節~四十一節

1 耶穌行過 ê 時，看見一人出世就 chhiⁿ-mî。2 伊 ê 學生問伊講，拉比，chit 人出世就 chhiⁿ-mî，tùi chī-chūi 犯罪，是伊本身，á 是伊 ê 父母 ah？3 耶穌應講，Chit 人無犯罪，伊 ê 父母亦無；獨獨 beh 用伊來顯明上帝 ê 所做。4 時 iáu 是日時，咱 tiòh 做差我 ê 工；暝時 beh 到，hit-tiáp 就無人會做工。5 我 tī 世間 ê 時，是世間 ê 光。6 Chiah-ê 話講了，就 phui noā tī 土腳，用 noā 攪土，用土 kō chhiⁿ-mî 人 ê 目矚，kā 伊講，去洗 tī 西羅亞 ê 池。(西羅亞，翻譯就是奉差)7 伊就去洗，tò-tng 來已經能看見。8 伊 ê 厝邊 kap 平素看見伊做乞食 ê，講，chit 人 kiám m̄是坐 teh 來求乞 ê mah？9 有人講，就是伊；有人講，m̄是，是親像伊 nā-tiāⁿ。伊家己講，我就是。10 In 就 kā 伊講，你 ê 目矚怎樣得 tiòh 開？11 伊應講，Hit-ê 名叫耶穌 ê 攪土糊我 ê 目矚，kā 我講，去西羅亞洗；我隨時去洗，就得 tiòh 看見。12 In 就 kā 伊講，Hit 人 tī tá-lòh？伊講，我 m̄知。13 In chhoā hit-ê 平素 chhiⁿ-mî ê 去見法利賽人。14 耶穌攪土來開伊 ê 目矚 ê 日是安歇日。15 所以法利賽人亦問伊是怎樣得 tiòh 看見。伊就 kā in 講，伊將土糜 hē tī 我 ê 目矚，我去洗，就看見。16 法利賽人中有 ê 講，Chit 人無守安歇日，m̄是 tùi 上帝來。有 ê 講，有罪 ê 人 thài 能行 chit 號神蹟 ah？In tùi án-ni 分 pêng。17 In koh kā chhiⁿ-mî 人講，伊已經開你 ê 目矚，你講伊是甚麼號人？伊講，是先知人。18 猶太人 m̄信伊平素 chhiⁿ-mî，能 koh 看見；到叫得 tiòh 看見 ê 父母來，19 就問 in 講，chit-ê 是 lín ê kiáⁿ，就是 lín 所講出世 chhiⁿ-mî ê mah？taⁿ 伊怎樣能看見？20 伊 ê 父母應講，伊是阮 ê kiáⁿ，出世 chhiⁿ-mî，阮知；taⁿ 伊怎樣得 tiòh 看見，阮 m̄知；21 chī-chūi 開伊 ê 目矚，阮亦 m̄知；伊大漢 lah；問伊，伊 beh 家己講。22 伊 ê 父母講 án-ni，是因為驚猶太人；因為猶太人已經有定約，若有認耶穌做基督 ê，tiòh kek 出會堂。23 所以伊 ê 父母講，伊大漢 lah；thang 問伊。24 In 就 koh 叫平素 chhiⁿ-mî ê，kā 伊講，Tiòh 歸榮光上帝；阮知 chit 人是有罪 ê 人。25 伊就應講，伊是有罪 ê 人 á m̄是，我 m̄知；只有知一項，就是我前 chhiⁿ-mî，現今能看見。26 In 就 kā 伊講，伊 kā 你做甚麼？án 怎樣開你 ê 目矚？27 應講，我已經 kā lín 講，lín m̄聽；啥事 ài koh 聽？kiám 是 lín 亦 ài 做伊 ê 學生 mah？28 In 就罵伊，講，你就是伊 ê 學生；阮是摩西 ê 學生。29 上帝有 tùi 摩西講話，是阮所知；獨獨 chit 人，阮 m̄知伊 tùi tá-lòh 來。30 Hit 人應講，這就奇 lah，伊開我 ê 目矚，亦 lín m̄知伊 tùi tá-lòh 來。31 咱知上帝無聽有罪 ê 人；獨獨人若敬拜上帝來行伊 ê 旨意，伊就聽伊。32 Tùi 古早以來，bē bat 聽見出世 chhiⁿ-mî ê，有人開伊 ê 目矚。33 Chit 人若 m̄是 tùi 上帝來，就無所能做。34 In 就應伊，講，你全然出世 tī 罪惡中，反 tng 教示阮 mah？就 kek 伊出。35 耶穌聽見 in kek 伊出；後來 chhē-tiòh 伊，就講，你信上帝 ê kiáⁿ mah？36 伊應講，主 ah，伊是 chī-chūi，hō我信伊？37 耶穌 kā 伊講，你 bat 看見伊，現在 kap 你講話 ê，就是。38 伊就講，主 ah，我信。就拜伊。39 耶穌講，我因為審判臨到 chit 世間，hō boē 看見 ê 人看見；也看見 ê 人變做 chhiⁿ-mî。40 Kap 伊 saⁿ-kap tī-teh ê 法利賽人聽見 chiah-ê 話，就 kā 伊講，總無阮亦 chhiⁿ-mî mah？41 耶穌 kā in 講，Lín 若 chhiⁿ-mî，就無罪；taⁿ lín 講，阮看見；就 lín ê 罪定定 tī-teh。